

► *Schutternan satisfecho cu awor si nan peticion a haya oido* **Gobierno a reserva terreno pa monumento di Schutterij**

ORANJESTAD - Diadomingo, 1 di december ultimo, a tuma lugar un ceremonia chikito pero hopi ameno na Adriaan Lacle Boulevard, riba e plaza conoci como Plaza 4 di Mei. Aki mas di 50 ex-schutter y nan famia a asisti na un acto conmemorativo cu hopi nificacion p'e ex-soldanan aki.

A hiba palabra pa Stichting Herdenking Schutterij Aruba, sr. Henrico Emerencia, kende a elabora un poco riba e historia di Schutterij y a duna un cantidad di motibo dicon Schutterij merece reconocimiento y un monumento. E disciplina, determinacion y capacidad di e miembronan di schutterij a keda enfatisa, mescos cu e hecho cu hopi di e miembronan di schutterij a bira ciudadanonan ehemplar cu a destaca muy en particularmente riba tereno di deporte y cultura.

Henrico Emerencia por a conta hopi storia di e tempo ei, pero pa motibo di tempo a

termina su discurso cu un conseho p'e generacion di awor, specialmente Arumil, bisando cu ta keda na nan mes awor pa traha dedica, imponiendo respet y disciplina. Sempert'e ehempel cu bo duna ta logra mas. Emerencia, na number di Stichting Herdenking Schutterij, a reitera cu Schutterij merece un reconocimiento duradero, un monumento digno cu lo keda manera un sentinela eterno ta vigila Aruba.

E monumento aki mester refleha e balor di antaño, un señal visibel di cue Arubiano ta dispuesto pa defende su pais te n'e ultimo rosea. Henrico Emerencia a declara: "Cu aunke schutterij no tei mas, e espirito si a keda."

E acto protocolario a sigui despues cu sr. Apolonio "Poy" Werleman, kende a elabora mas riba algun di e acontecimientonan na Aruba durante di Dos Guerra Mundial. Manera e diferente atakenan di submarino, e cañonnan di

Kustbatterij na Yuana Morto y varios detaye di e bida den e periodo ei.

Poy Werleman a splica cu e fundacion ta trahando riba dos proyecto cu nan kier mira realisa. E prome ta un monumento conmemorativo cu lo perdura y e di dos ta un buki documental informativo. Intencion di e buki ta pa documenta tur hecho di e periodo di Segunda Guerra Mundial pa loke ta trata Aruba. Den e buki aki lo pone un lista di nombrenan di tur integrante di tanto VKA, Schutterij, Mariniers y Kustbatterij cu a sirbi como solda e tempo ei. El a termina haciendo un suplica na tur hende cu por tin potret of otro informacion relevante, pa tuma contacto cu e fundacion p'asina esaki keda inclui den e buki.

Pa termina e atardi, Minister Ramon Lee a hiba palabra unda el a confirma cu e deseo ferviente di e grupo di ex-soldanan aki, tin oido di henter



Gabinete Oduber III y cu esaki ta solamente un comienso. El a gradici e ex-schutternan y tur hende presente y a expresa cu e tambe, un dia lo kier mira e historia aki graba den piedra riba un monumento cu lo ta simbolo di disciplina y dignidad cu ta representa un cuerpo militar.

Despues Minister Marisol Lopez Tromp, den presencia di coleganan Rudy Croes y Ramon Lee a haci entrega di carta n'e fundacion, representa dor di Henrico Emerencia y

Hubert (Shon) Th. Lopez, den cual gobierno ta otorga e tereno pa un monumento segun e peticion cu nan a entrega. Cu esaki un prome paso importante a ser tuma pa encamina e proceso di yega na un monumento nacional pa reconece tur esnan cu a sirbi como solda den di Dos Guerra Mundial.

Pa mas informacion por tuma contacto cu miembronan di Stichting Herdenking Schutterij Aruba, P.O.Box 466, Oranjestad.